

柯山集



柯山集卷二十一

宋

張

耒

撰

七言絕句

吹角

斷霞歸鳥隔山鍾日過西山轉海空長恨南城催曉急
五更吹角怨秋風

登槎亭

海天秋霧暗乘槎風響空山浪卷沙杳杳艣聲何處客
二帆衝雨暗天涯

臘

荒秋野水間荆榛惟有青山日對門
草木向陰猶帶雪風光近臘已如春

題宅後井

原注泉色正白

清泉十丈白如漿甘似醍醐透椀涼
君欲道中無渴死百尋操纆莫辭長

和房日嚴換武詩

青衫厭著待封侯慷慨知君定遠流
莫歎書生長齷齪元戎曾與報更籌

春

磔牛門外色初分共喜釵頭彩勝新
花萼怯寒猶積雪烏聲催報已知春

感春三首

日長殘雪滴高簷院靜人間風度簾
可是歲華隨日好故應愁恨逐春添

冰消水面波光動日暖樹梢花意歸
世上繁華易零落却應春淺勝芳菲

梅梢柳眼弄春嬌雲暖南山臘雪消
近郭樵漁成野市

木山集
卷三
遠村簫鼓隔溪橋

荒園

荒園午日照青蕪樹罅鳴鳩相應呼一片陰雲送山雨
漸漸新麥地親鋤

小雨

蕭蕭小雨不能收一霎西風便似秋枕席夜涼燈火暗
丁丁更漏隔南樓

看花

風暖日高花氣動鳴鳩乳燕自求羣經營美景還詩匠

傾掃頑愁賴酒軍

題唐宋輔城上小樓二首

沙田小雨不成泥一帶溪光照翠微遠目直隨殘日盡
晚雲還望故山歸

近郊小徑絕人行水滿菰蒲取次生沙岸雨來長集燕
桑田深處忽聞鶯

晚歸

學省歸來門巷秋伴眠書史滿牀頭低雲漠漠梧桐晚
屏上江山亦解愁

秋

日落星稀河漢微
清秋一點水螢飛
涼風白露愁先覺
可待梧桐報即知

調全玉病二首

維摩丈室自蕭然
病起新涼得恣眠
我愧聲聞難問疾
想君獨對散花天
詩將收功久戢戈
羸師再鼓奈疲何
想君無物驚禪定
獨未能除是此魔

女几山

不復當年端正樓
多情猶問故宮遊
山川不改繁華盡
須信人生一世浮

昏昏

昏昏落日下墻東
厯厯晴雲送去鴻
歲晚蒼槐甘老大
盡將黃葉附秋風

謝仲閔惠友于泉

原注泉上多紫竹

地吉泉甘慶所鍾
直疑遙與惠山通
曲肱煩暑都消盡
如臥蕭蕭紫竹風

貧病投劾乞補外
官親友問者以詩答之

木山集 卷三 四
卑如揚子官執戟貧似玉川居洛陽不敢彎弓輕妄射
爭如覆被逐山郎

楚王

十二巫山聳翠巒楚王宮殿玉巔岼定知爲雨爲雲處
不似當初夢裏看

宋玉

雲雨朝朝峽裏興可能無復夢中情巫娥若問誰爲賦
敢乞君王道宋生

項羽

沛公百萬保咸陽自古柔仁伏暴強慷慨悲歌君勿恨
拔山蓋世故應亡

范增

君王不解據南陽亞父徒誇計策長畢竟亡秦安用楚
區區猶勸立懷王

蕭何

蕭公俯仰繫安危功業君王心獨知猶道邵平能緩頰
君臣從古固多疑

韓信

登壇一日冠羣雄
鐘室倉皇念蒯通
能用能誅誰計策
嗟君終自愧蕭公

賈誼

賈生未免孝文疑
自古功名歎數奇
逐得洛陽年少去
白頭絳灌亦何爲

李廣

李廣才非衛霍儔
孝文能鑒不能收
君王未是忘征戰
何待高皇萬戶侯

東方曼倩

軒冕功名何足爲
先生聊作易農資
漢庭誅死皆卿相
猶說才能勝滑稽

成帝

百華衣上漬餘香
夜照猶煩蚌有光
解道溫柔勝武帝
不知壯髮似元皇

趙飛燕

苦心膏沐不論貴
富貴入生各有時
直使中流畏仙去
君王何啻似嬰兒

朱雲

木山集 卷三 六
直言請劔斬安昌勿謂朱游只素狂君看漢家文景業
張侯能以一言亡

孔光

鄉原世盡謂醇儒漢室傾危孰與扶試問不言温室木
何如休望董賢車

梁冀

力回漢鼎未收功又道將軍世上雄不悟折腰同齟齬
百般裝束爲秦宮

殷浩

田野高風過有薰廟堂經畫竟無聞固應竹馬思元子
江左興亡不在君

偶成

低雲著地曉悠悠雨濕簾旌不上鉤江北江南千萬里
年年長向此時愁

傷春

浮雲冉冉送春華怯見春寒日欲斜一夜雨聲能幾許
曉來落盡一城花

七月六日二首

月落暗蟲啼不休五更白露曉悠悠西風是處將搖落
可但梧桐獨報秋

積雨空階生綠衣幽幽點點弄秋姿黃昏樓角看新月
還是去年牛女時

元忠學士八兄未離京師遠蒙追送許惠服丹法
託故竟未惠及賦五絕句

身逐孤舟似斷雲故人追送尙殷勤秋城夜泊西風岸
落葉悲蟲獨自聞

衰柳苦催空壁月悲蟲真弔短檠光無情少壯拋人去

只有窮愁氣味長

欲盜羲和一點春五更注想隔重雲如何但欲獨不死
分我刀圭未費君

昔見將軍破虎韉玉堂曾共掃千言功名老去皆蹉跌
相見諄諄勸學仙

無復顛狂似少時逢君猶自說蛾眉玉堂舊事君休念
兩袖啼痕又送誰

閒步

枝上啼鴉巢欲成晴簷向日乳鳩鳴可憐霜雪餘威盡

春草無名著處生

寓楚題楊補之官舍

一辭螭陛走天涯
客路悠悠老歲華
住久不知身是客
自來堂下採黃花

傷春四首

曉雨催春不惜花
亂紅飄泊委泥沙
傷心憶得年時事
白髮風前只歎嗟
紅杏牆頭最可憐
膩紅嬌粉兩娟娟
曉來併逐東風盡
容易分飛又一年

嫩紫妖紅惜不得
亂隨風雨點蓬蒿
田野草花開晚
主管春風輸爾曹

高樓春晝獨驚心
白日閒雲亦自陰
風雨催花花已盡
滿城新綠亂鳴禽

三鄉道中遇雨

蕭蕭古道西風雨
慘慘黃昏匹馬行
未遇功名莫嗟歎
逢時更自憶平生

題南禪院壁二首

乞食高僧午未歸
秋庭落葉日暉暉
蕭條古寺松陰下

簷鐸風中乳鴿飛

秋林落葉已斑斑
秋日當庭尚掩關
掃榻書眠聽鳥語
可憐身世此時閒

次韻王彥昭感秋三首

木落風高秋雁歸
初晴野水漲清伊
東流會向淮南去
憑寄秋來無限悲

年來詩酒最關身
滿酌休論薄與醇
愁見洛陽秋夜月
無情偏照不眠人

塵埃容易點吳衣
澤國秋來信息稀
想見淮南初木落

秋雲秋水雁初飛

絕句三首

藹藹晴郊花氣浮
午窗晝睡擁駝裘
覺來烏雀茅簷靜
屋角春風怒未休

照水輕明楊柳芽
隔林相映占巢鴉
東風香草城邊路
到處人家盡是花

淮上春風萬鼓聲
落帆舟泊岸邊磯
喧喧野市殘陽裏
沽酒攜魚客散歸

雨後遊朱園

綠葉陰陰護翠枝
晚花雖小亦應稀
東風不惜殘桃李
吹作春愁處處飛

酒病中寄李十二招飲二首

班郎握筆未封侯
嗜酒揚雄欲白頭
寂寞著書誰作伴
西枝風葉碧梧秋

酒病岑岑更怯寒
一窻疎雨擁衾眠
西風一入庭前樹
便有秋聲到枕邊

乍晴二首

洗來桐葉晚青青
積雨欄干暗菌生
牆角半傾苔暈白

蕭蕭風草一蛩鳴

虹長飲雨川無滴
蘋末生風沼有波
一掃煙雲不知處
夜天如水瀉銀河

雜題二首

寒雨蕭蕭桐葉驚
浪浪還作夜堦聲
西風忽起幽人覺
枕簟涼時向五更

蒼蒼落月井梧西
睡覺幽人自卷帷
只有林鶯知夢斷
曉庭人靜語移時

徐園閒步二首

平田小雨潤新耕
曉日園林信脚行
襯步野蕪吹面柳
可憐春物總多情
動地春風晚未休
吹花折柳却成愁
塵埃不用煩車馬
獨臥氍毹正擁裘

雜詩二首

邾城山下梅花樹
臘月江風好在無
爭似姑山尋綽約
四時長見雪肌膚
病腹難禁七椀茶
小窻睡起日西斜
貧無隙地栽桃李
日日門前自買花

絕句

伏暑新除風露清
五更山舍一雞鳴
幽人枕上朦朧睡
臥看東岡次第明

赴官咸平蔡河阻水泊舟宛邱皇華亭下三首

怒河憑雨正奔流
踏踏卑梁滯去舟
淹泊我生應有定
不須歸怨一汙溝

裊裊悲蟬古柳風
水邊幽草已鳴蜚
長河未放羲和宿
却放斜陽更向東

夜空如鑑碧新磨
倒影疎星亂素波
天色水光無別處

爲君垂手攬銀河

春雨中偶成四首

廉纖小雨作春愁
吹濕長雲漫不收
架上醱醱渾著葉
眼明新見小花頭

槐葉青青染不如
護巢鴉語有新雛
蕭蕭晚雨窓鳴急
臥穩藜牀土枕書

天低芳草接浮雲
萬柳含煙翠不分
燕子歸時花徧落
暮寒和雨入黃昏

春陰只與睡相宜
臥聽鳴禽語復飛
一縷斷香浮不散

何人深院晝熏衣

春詞二首

殘紅新綠間鞦韆
寒食園林人意闌
一陣春寒花上起
畫廊連夜雨珊珊

靄靄芳園誰氏家
朱門橫鎖夕陽斜
鳩鳴鵲噪閒庭館
盡日春風吹百花

遣興

百感摧傷強對春
看花花畔獨沾巾
祇應閉目林中坐
須學無言壁下人

潮水二首

水滿清淮自在流落花吹盡浪悠悠總將春雨為春淚
未比思君一半愁

近來消息愈堪猜飛鳥無情不肯迴惟有清淮慰人意
春流日日自東來

夏日池上三首

新蟬上樹空遺蛻野雀哺雛爭小蟲粉沾衣袖竹枝雨
香滿水亭荷葉風

落日鳴蟬夏木荒芙蓉半落柳成行何人紈扇生新浪

亭館迎秋夜涼

拒霜灼灼欲破紅夜來雨落荒蘭叢空亭無人日色午
但聽桐葉驚秋風

秋日卽事三首

支離臥病不知秋暑退初驚大火流蟋蟀知時鳴近壁
銀河照夜直當樓

蕭條歲晚搔雙鬢流落天涯念舊遊惟有醉來心暫展
無錢沽酒合長愁

蕭蕭衰草傍牆生中有寒蟲白日鳴秋物荒涼禾稼熟

悠悠驅馬水邊行

秋雨二首

南山雲起滿庭陰
簾幕初涼七月深
桃子壓枝桐葉老
連絲風雨作愁霖

離披衰柳已無蟬
黃葉閉門風雨天
陶令無錢難得醉
竹窻過午枕書眠

秋夜寄遠

秋晚蕭條風露清
星河耿耿漏丁丁
祇應新月頻相見
長向玉樓東畔生

秋夜

微雲淡月夜朦朧
幽草蟲鳴樹影中
不待南城吹鼓角
桐聲長報五更風

遠思

裊裊霜風吹碧梧
孤城殘角奏單于
山川浩蕩愁千里
樓閣黃昏月一梳

臣那彥成恭校

柯山集卷二十二

宋

張

耒

撰

七言絕句

懷竟陵蓮花

景湖門外有汀洲灼灼紅蓮照碧流
公子不歸時節晚兩枝風葉臥清秋

懷陸羽井

寒泉背石老松根禪室幽人古像存
長恨千年無屈宋楚招難與此遺魂

冬日懷竟陵管氏梅橋四首

旅居澤國小園林千里相望歲暮心想見竟陵殘雪裏
新梅點雪橘垂金

小小園林點點梅如今綽約爲誰開只應清夜新霜裏
依舊橫斜倒影來

他日華陵跡已陳嘉辰懷舊一銷魂小園依舊誰相念

應有新梅覓故人

原注 復州竟陵郡有五華山故亦云華雙

堂下幽芳自可人北風一爲屏埃塵上元簪珥玲瓏玉
却曳青霞霜女裙

卮臺寺三首

諸佛蒼然照殿楹圓光明滿自然燈千年遺事無人問
解後高眠久屬僧

峨嵋前約已成空風雨蕭蕭送暮鐘何用忘饑來問話
不如松下謁癡龍

世味嗟予淡莫加更將詩句寄烟霞自憐落筆無好字
不及揚州王謝家

過蘄澤

雄吞六國弱秦強壯士逡巡野水傍耕叟不知鴻鵠志

笑觀宮室忤陳王

崇化寺三首

樓殿沉沉鎖夜烟
燈一點佛龕前
梧桐葉上三更雨
亦有愁人獨自眠

白髮荊州嘆滯淫
吳衣重杵巡城砧
遣愁莫上高樓望
只有愁來晝日陰

零落宮牆官樹秋
行人東去路悠悠
祇應樓下邯鄲路
亦有離人對此愁

偶成

漫學文章弊性靈
屠龍藝就誤平生
翩翩仕路新冠蓋
何用揚雄強作經

贈趙簿景平二首

明道新墳草已春
遺風猶得見門人
定知魯國衣冠異
盡戴林宗折角巾

紛紛俗物久堪憎
愛子蕭蕭眉宇清
莫嘆青衫掩事業
白頭卿相死無名

自遣四首

是非得失一區區
蚊蚋啾啾共一壺
不學退之求羽翼

惟憑一夢到華胥

誰云造化本無情利害乘除理甚平莫逐衆情生溫喜
君看三四孰虧盈

誰云至理宗無相大道由來萬法兼且以聲音爲佛事
曉敲清磬誦華嚴

浮世榮枯理易觀不勞重取朽龜鑽直應桃李繁華日
便把荆榛寂寞看

立秋二首

西風嫋嫋木颼颼身在江湖北岸州自古楚人詞最好

爲君重賦竟陵秋

對酒聊同楚人醉哦詩惟聽越吟聲洞庭北岸孤城下
落月西風聽曉鶯

晚步靈壽寺後二首

秋城草樹欲黃昏微逕新晴菜甲新便好灌園從老圃
此懷原是漢陰人

逢秋種菊尙殷勤隙地侵尋欲過鄰便好採花供服餌
形容已似澤邊人

感秋三絕

秋思鄉愁兩苦辛更臨西北望秋雲此生更老情終在
誰爲寄聲千里人

楚天未白轉星河樓角先吹出塞歌長愧侵床五更月
殷勤無計謝姮娥

高林敗葉已颼颼更有寒莎翠已收若道神仙脫情累
如何獨唱感庭秋

局中聽雨

秋庭聽雨斷人聲涼入衣裾秋意生臨水登山送歸語
憐君解有許多情

夜思

萬聲沉寂漏丁東金井欄干上暗空半夜西風人未覺
秋聲先報草根蟲

晨起二首

楚鄉秋早倦炎蒸長恨梧桐不可憑爽氣忽隨風雨至
曉堂無寐獨神驚

中宵爽氣入衾裯簷雨浪浪曉未收三伏炎歊掃除盡
待教明月放清秋

近中秋

姮娥藥熟桂華新滿貯清光待出雲徐御冰輪行碧落
世間多少感秋人

章華

長恨章華亦陋夫周秦僅可勝登徒誰知南楚仍窮巷
骨像何妨自應圖

秋晚

日轉秋庭樹影斜風來粉蝶勝悲笳祇應宋玉秋來夢
常在牆東阿子家

遷居對雨有感

楚鄉風物淡悠悠獨掩閒門客滯留盡日無言對秋雨
相敲蕉葉各吟秋

竟陵僦舍仍有小園景物頗佳

荒涼臺閣追隨事懶慢江河放逐臣應是主人憐寂寞
僦居仍有小園春

題西園醑醺

風霜老桺蹙龍蛇中有青春白玉葩要使根深生意遂
不妨秋雨臥泥沙

西軒

出架薔薇秀晚枝
雨餘屋角理蛛絲
可憐一曲秋風地
萬思千情鬪入詩

九月十日菊花爛開

蕭條秋圃風飛葉
却有黃花照眼明
已過重陽慵采擷
自嫌亦作世人情

讀除目有感

禍福茫茫不可猜
可能憑勢卽無災
相君西闥揮毫日
豈料方還此地來

效吳融詠情

依依漠漠復紛紛
觸處相隨過曉昏
知是妄緣除不盡
更教風月助吟魂

竟陵酒官舍北有數步草
歲寒霜落猶鬱然也予
爲障其風霜暮冬尚白如
一日大火焚舍無遺復
往尋草不復有矣

爲愛墻隅芳草色
故遮霜霰待新春
火燒雨洗尋無處
祇有東風吹舊塵

臘日步西園

三畝寒園春欲回
淺池低樹忽飄梅
楚鄉萬里霜雲盡

歸雁行行斜日來

夏日七首

兩架醱醱側覆簷夏條交映漸多添春歸花落君無恨
一架清陰恰滿簾

野水彎環夏木森清蟬晚噪碧雲深扁舟兩槳誰家子
萬里江湖此日心

斲篔簹紗樹與夏宜法曹腰腹大何為重雲到地翻盆雨
却是幽人隱睡時

千蛙鳴噪汗池水萬螿奔馳一腐蟲得喪世閒能幾許

冥冥高處有飛鴻

涼風一掃宿雲輕隱隱收雷不復驚試決小池疏積潦
誰教蛙吻頓無聲

風轉翻翻梧葉驚入簷白雨打窓鳴應將清絕酬無睡
穩聽空階半夜聲

女几山前官舍清遶堂鳴澗夜泠泠塵埃別後何由見
簷雨三更起坐聽

甘風晝臥口占三首

康濟朝饑進湯餅誰何午睡屬新茶讀書隱几聊復爾

謝客局門豈不佳

甘風遠集聞朝嘒
怨月深栖有夜鳴
涼牖疎明稀老翠
雨畦幽獨立新青

學道窮年要有得
強顏于世欲何求
病栽惹以無勞謗
濕要鞠窮不待搜

風贈无咎

欺馬街泥未肯乾
重城含霧曉漫漫
誰令萬屋淋漓雪
猶作長安半夜寒

晚春四首

楊柳藏鴉筍作竿
曉風吹雨作輕寒
清陰一片收春去
留得薔薇數點殷

薔薇倒架筍過鄰
夢澤茫茫欲晚春
綠暗紅稀君莫嘆
滿枝梅杏欲嘗新

洗雨吹風欲晚春
盡收紅紫布青雲
眼前消長諳已久
清坐不妨長閉門

荒畦零亂滿蕪菁
春事收功欲老成
鵲噪鳩鳴莫無賴
曉枝干轉有雛鶯

懷金陵三首

此君堂後青蒼玉別後何曾寄一聲想見秦淮月堂下
西風吹浪拍堤平

璧月瓊枝不復論秦淮半已掠荒榛清溪天水相澄映
便是臨春閣上魂

曾作金陵爛漫遊北歸塵土變衣裘芰荷聲裏孤舟雨
卧入江南第一州

水閣二首

積雨荒池水欲平軒窗長夏有餘清公餘一枕滄浪夢
臥聽風荷受雨聲

池水亭亭如有光曉風清露點新粧翠帷自障非遊女
多謝經營白鷺郎

出京寄无咎二首

不許多聞長樂鐘打包且遇又匆匆長安城裏誰相識
只有周南太史公

老去相看情益親河梁分手欲沾巾祇應誦得離騷賦
長作行吟去國人

讀史二首

區區姦智終何補不悟身猶弄伎兒蛇斷楚郊秦未覺

鬼謀曹社夢先知

嬴秦餘祚已蛇分車府凶高尚畏人安有區區猶指鹿
從來燕麥不曾分

韓信祠

有序

史稱信之族誅予嘗疑之其謂陳豨曰王至上
必自將予從中起夫使高帝將精兵于外而信
欲詐驅徒奴烏合之衆于京師雖太公穰苴不
能以成事此猶魚休于猛虎之穴虎歸則無事
矣信謀無遺策豈肯爲計若是之疎哉况蕭相

國在長安信獨不畏之耶此殆以高帝出征以
信失職畏其亂于內亦若彭越使人告之而傳
致其詞如此耳不然信不忘漂母一飯之恩信
遇高帝恩亦厚矣一旦背之豈人情哉

千金一飯恩猶報南面稱孤豈遽忘何待陳侯乃中起
不思蕭相在咸陽

題淮陰侯廟

有序

呂太后勸高祖誅彭越使舍人告其反而越固
未嘗反也特以爲名耳高祖將兵居外而太后

在長安太子仁弱不知兵而韓信方失職在京
 師呂畏其乘時為亂而不可制使人誣告其反
 詐召而誅之耳方是時蕭相國居中而信欲以
 不臣請烏合不教之兵欲從中起以圖帝業使雖甚愚
 必知其無成以信之雄才謀無遺策肯出此哉
 太史公記陳豨反事言豨居代多致賓客周昌
 畏其不軌而奏召之不至豨因自疑而其後通
 曼邱臣王黃遂反此司馬遷所謂邪人進說遂
 陷不義者也遷載豨反事未嘗一言及信吁此

遷欲見誅信之寃也

雲夢何須偽出遊遭讒猶得故鄉侯平生蕭相真知已

何事還同女子謀原注何不為信辨其任也

假王城

逃戰彭城似去邠興王可即廢為臣中原多少堪憂事
 勞苦君王八馬奔

挂劍臺

上國歸來歲月深悲嗟脫劍挂高林欲知不負徐君意
 便是當年讓國心

古意

樓上珠簾拂疎網却勻愁黛對凌波也知新舊爭多少
敢話機頭織素多

道彭澤

姓陶令尹今何在空補陳編歸去來安得春江作春酒
百年長與子銜杯

柳

永豐坊裏舊腰支曾見青青初種時看盡道邊離別恨
爭教風絮不狂飛

題宣州後堂壁四首

過雨山亭暑氣微老人猶未試生衣滿園閒綠無人到
春日南風燕子飛

我欲留春情不淺青春別我苦無情敬亭山下紅千樹

日日南風綠滿城

翠樹陰陰晚雨回江山清潤絕纖埃軍廚煮酒香初熟
更釣溪魚斫鱸來

流落天涯一病身簿書叢裏費精神殷勤照水窺華髮
黃鳥聲中又一春

宋景平命賦隔牕花影

午睡簾櫳春日長
半消金鴨水沉香
隔牕花影時來去
疑有東鄰覘宋郎

晚春初夏八首

陰陰夏景變餘春
清曉園林未有塵
日日東風欺弱柳
鵝黃吹盡作青雲

少室山前日日風
望嵩樓下水溶溶
卷將春色歸何處
盡在車前榆莢中

吹盡成蹊桃李塵
兔葵燕麥一番新
只應解籜抽青玉

霜節稜稜尚可人

古柳參天鳴啄木
青蕪覆地下鳴鳩
白頭懶作留春計
睡起移時獨倚樓

睡足高簷春日斜
碾聲初破小龍茶
樓邊緣樹飛紅盡
春色牆陰老薺花

青春已鬢明年事
晝漏初知夏景長
日日南風筍成竹
殘紅雖有不成妝

春歸草木漫青紅
半委塵埃半逐風
誰似長楸百餘尺
高張錦繡照青空

梅山集 卷三
餘醺壓架不勝繁洗雨吹風更可憐姑射仙人本仙骨
百花凋盡獨嬋娟

梅花十首

月落嚴霜自理妝北風工爲發清香曉英數點辭人去
幽獨無人爲斷腸
幽恨清愁幾萬端故將巧笑破霜寒落英收拾供騷客
秋菊從來不足餐
姑射仙姿不畏寒謝家風格鄙鉛丹誰知檀萼香鬢裏
已有調羹一點酸

林外啼禽自往還風前詩客倚闌干小園門鎖黃昏月
耿耿幽姿伴歲寒

玉粟勻圓官樣黃領巾借與十分香衝寒不爲生春物
自要晨霜爲洗妝

清寒池館靜無塵歲歲相逢似故人在遣牆頭疑是雪
欲教園木早知春

脉脉無言亦有期雪中狂殺羽林兒可憐多少幽奇事
却是東風總不知

任教雪壓色終勝却要風嚴香更聞江雨細時青子熟

聞名猶救渴將軍

數點深藏碧玉枝
翠峰十二擁瑤姬
憑君說與凡桃李
徹骨清寒爭解肥

三畝荒園草棘荒
可堪終夜北風狂
瑤環瑜珥誰將去
嘖嘖幽禽啄蕊黃

絕句二首

萱草開時燕引雛
石盆雨滿長萑蒲
但令甕有賢人酒
何用門迎長者車

門前山樹插雲青
雨足山前稻水平
桑柘半空蠶事了

綠陰深處轉殘鶯

吳廷選恭校

柯山集卷二十三

宋

張

秉

撰

七言絕句

臨淮道中

凜凜春寒犯客裘
輕陰殘雪放孤舟
無端惟有堤邊柳
作態東風惱客愁

許同塵示張八侍郎避暑覽館中舊題絕句俾之

同作次韻

聚散人生集渚鴻
飛鳴邂逅一宵同
是非榮辱何勞問

共在邯鄲一枕中

西園風雨雜花謝

楚澤春殘雨又風
啼鶯芳草思無窮
蕪菁滿地黃金爛
不及薔薇一點紅

慈湖中流遇大風舟危甚食時風止遊靈巖寺

心悸西江浪似山
眼明僧舍一窓閒
從今要見廬山面
畫作屏風靜處看

寓淮陽驛二首

一庭秋色高堂夜
半壁燈光短幌涼
都是去年秋氣味

誰知飄泊古淮陽

悠颺短日下西墻
庭葉吟風作夕涼
客枕甚安無一事
鄰雞不用喚朝陽

觀魚亭呈陳公度二首

千古濠梁莊惠詞
不須反覆辨真知
直應人意逍遙處
便是游魚自樂時

獵獵微風波面開
近人鷗鷺不相猜
樽前忽起扁舟興
新管江南山水來

寒食離白沙

莫驚客路已經年尚有青春一半妍試上芳堤望春野
萬絲楊柳拂青天

紹聖甲戌侍立集英殿臨軒試舉人作此兩絕

春來小殿雪初殘曉日曛曛未破寒黃繖當軒公事退
君王緩步侍臣闌

弱歲干名翰墨場春寒搖筆試西廂茫然二十年間事
還著春衣侍玉皇

同仲達雪後踰小山遊蔡氏園得紅梅數枝奇絕

因賦一首

與君涉蹶踏春泥邂逅紅梅得一枝失格孤山風露却

却成卯酒醉冰肌

原注李正封牡丹詩
有國色朝酣酒之句

北風凜凜留高樹融雪涓涓聚小塘三畝山園半春草
無人為結小丁香

戲呈希古

半世辛勤守黃卷白頭容易過青春枕前亦覺春晴否
試問東鄰晚起人

賞心亭

楫迎桃葉家何處槩送莫愁人已非獨立東風今古恨

春江無語又斜暉

題洛尾亭二首

原注入汴
第一亭

日出南山春霧收
渾渾洛尾人淮流
莫向行人贈楊柳
折將離恨入孤舟

洛尾亭邊淮汴交
來波去浪恨迢迢
無端更洒黃昏雨
吹作春愁不肯消

題周文翰郭熙山水二首

魚村橘市楚江邊
人外秋原雨外川
遣騎竹邊邀短艇
天涯暮色已蒼然

洞庭葉落萬波秋
說與南人亦自愁
指點吳江何處是
一行鴻雁海山頭

立春三首

天上春來誰報人
江山氣象一時新
懶將白首簪幡勝
壽酒三杯慰逐臣

風光先著竹間梅
和氣應從九地回
桃李滿園渾未見
微紅先向寶刀開

蒼龍闕角回金斗
文德門南散曉班
車馬紛紛殘雪裏
鏤銀剪綵舞新幡

寒食

庭院輕寒新雨過江城寒食野花飛故園北望一千里
極目江楓客未歸

竟陵夢野亭在子城西南角一目而盡雲夢之野
最爲郡中之勝

高甍巨桷壓城闔平視如將七澤吞幾度春光招宋玉
碧闌干外獨消魂

奉符縣北二十里林家莊馬鋪壁間有草書數行
半毀矣問其人云熙寧中錢提刑所書予考其時

蓋翰林四丈穆父也錢公謫秋浦而卒其子已免
喪矣覽之不覺失涕因留一絕

龍蛇半滅亭間字泉壤長埋地下身從此世間無玉樹
故人三嘆淚沾巾

木芙蓉菊花盛開

空山岑寂何所有晚菊芙蓉相對幽伴我悠悠過閒日
憐渠灼灼媚窮秋

夜間風雨有感

留滯招提未是歸臥聞秋雨響疎籬何當粗息飄萍恨

却誦僧窓聽雨詩

次韻智叔三首

才似庖刀不待斲思如流水更清冷詩壇李杜誰爲將

盡埽欒槍正國刑

公子風流更可人仙家問訊柳湖春煩公甕下一杯水

洗我胸中百斛塵

今朝一見詩人詩不用更尋黃絹詞深山一鶴自唱和

亦有松下童子知

絕句

竟陵秋色清如水客舍飄梧墜晚階已掩重門風葉定
玉鈎還向玉人來

西園

滿園紅紫春無限盡日飛鳴鳥自由夜雨朝晴風日好
盡舒雲錦不能收

晚春

苔封池面草芊緜鳴蚓跳蛙意苦便頗覺風雲有奇變
翻盆一雨便潺湲

殘春三絕

低簷送雨晚霏微濕透梅房白漸肥半捲畫簾屏扇掩
朦朧春睡擁春衣

闌干倚徧更消魂春到淮南得幾分裊裊柳枝烟雨濕
畫樓殘角送黃昏

強尋春物散無聊直使樓高恨未消鱗碧萬家看不盡
杏花時見隔牆梢

偶題二首

相逢記得畫橋頭花似精神柳似柔莫謂無情卽無語
春風傳意水傳愁

春水長流鳥自飛偶然相值不相知請君試採中塘藕
若道心空却有絲

宛邱道中

日斜沙路馬翩翩故欲迎涼不著鞭誰解多情似新月
伴人歸去照人眠

青桐道中值雨凡數里舟行久之頗有江湖之思
二首

繫馬操舟問檝師却疑淮口掛帆時人間遷改何須問
便作江湖未可知

冥冥烟外鳥飛歸野老得魚收網迴隔浦斷霞沉欲盡
半彎新月出雲來

宿咸平驛

蕭蕭暗葉鳴秋雨淅淅窓風戰客燈世味飽諳心已老
不煩潘鬢強侵陵

蕭蕭

蕭蕭風雨五更初枕上秋聲獨井梧只有菊花猶灼灼
苦教摧拉就荒蕪

淮陰道中

映日斷霞臨水盡出雲新月向人來野塘秋晚無行迹
點點黃花照水開

夜坐

庭戶無人秋月明夜霜欲落氣先清梧桐真不甘衰謝
數葉迎風尚有聲

試筆

學館華鹽驚歲晚寒窗書史伴身閒年來輒軻甘言命
老去追隨厭強顏

新春

水鄉清冷落梅風正月雪消春信通昨夜園林新得雨
杏梢爭放曉來紅

野步

帶水依城一逕微出城桃杏雨來枝最憐楊柳身無力
付與春風自在吹

春日偶題四首

漫漫東風百草長天桃如笑柳如粧惟憑酒作青春敵
收拾風光入醉鄉
隔屋桃花暖鬪粧好風時有過墻香滿園芳草無人種

何事春來特地長

舍北小桃纔及肩可憐枝弱苦花繁黃昏雨急東風惡
惜爾不禁春夜寒

白首傷春一老翁預愁寒食過春中下簾數點黃昏雨
一霎輕寒青杏風

偶成二首

新引龍孫欲解包籬根抽筍已稍稍莓苔雨過蝸緣壁
楊柳葉深鶯有巢

乍晴幽步踏斜陽殘潦青苔曲徑荒風擲落花填小塹

雨催芳草上空牆

題軫師房二首

漠漠雨苔依砌綠
鮮鮮秋菊映堦黃
山僧睡起日亭午
出戶微微柏子香

銅瓶布衲出塵埃
疎瘦風標日一齋
門逕蕭然更無事
生螢飛鷓及時來

初離山陽迴寄城中友人二首

落日昏昏向水低
五更殘燭一聲雞
祇應魂夢猶東去
從此扁舟日向西

野岸蕭蕭落葉風
秋光離思兩相攻
殷勤臨水揮雙淚
憑寄清流却向東

淮陰晚望

蕭蕭衰柳來時路
裊裊危檣西去船
白鳥歸飛夕陽盡
斷霞風約過平川

宿第四鋪

繫纜寒沙傷客情
秋雲不動夜陰生
蕭蕭兩岸黃榆葉
解報三更雨到聲

初見嵩山

年來鞍馬困塵埃，賴有青山豁我懷。
日暮北風吹雨去，數峰清瘦出雲來。

有感

鬢毛已自秋來變，髀肉仍于馬上消。
滿眼青山不歸去，強顏微祿亦何聊。

福昌官舍後絕句十首

淮南梅柳想春還，怯見西州歲暮寒。
惟有看山心未厭，清明終日在闌干。
小園寒盡雪成泥，堂角方池水接溪。
夢覺隔窓殘月盡，

五更春鳥滿山啼

無客門闌盡日扃，兩行喬木擁寒廳。
吏胥借問官何在，流水聲中看竹行。

漫與東風作主人，栽培花草伴閒身。
不辭伐竹成高架，收拾薔薇一片春。

卧聽堂南布穀鳴，隴頭細麥已青盈。
殷勤謝汝催春種，我爲無田豈懶耕。

翠竹留人不忍還，暖泉春漲已潺潺。
寄言山鳥休歸去，與爾同來樂此間。

洛川春色幾時歸
漾漾清流點翠微
日暖雪消沙岸軟
鴛鴦相對不驚飛

風吹春日下南山
尚有輕冰結暮灘
何事鴛鴦故相守
清溪不怕夜栖寒

不掃竹根藏筍苗
旋培殘雪擁蘭芽
爲君更接櫻桃樹
付與春風換却花

清明山色到前簷
汨汨溪流聚小潭
一樹竹窓晴晝睡
依依春夢入江南

夢周楚望

春風吹夢到淮南
一夕從容盡笑談
睡覺始知經歲別
洛陽新柳已毵毵

絕句

坐局歸來已暮鐘
濛濛寒雨濕裘茸
正須牆下一壺酒
不怕江頭三日風

有感

屋角纖纖掛斷虹
清蟬一噪起高桐
天涯雲盡見殘日
林下雨餘來好風

贈鐵牌道者

微官待旦亦朝天
賴爾絕勝鐘鼓傳
舉世昏冥竟難警
憐君常負五更眠

讀吳怡詩卷二首

羅田春動雪消初
主簿清詩雪不如
休學風騷窮事業
花前莫負古銅壺

疎梅半落雪中香
想子孤吟對酒缸
野水荒山半猿鳥
跨驢誰問賈長江

題趙棗所收趙令穰大年烟林二絕

江上孤烟蔽遠林
秋原人靜下鳴禽
水鄉此景常經眼

誰信侯家畫萬金

楓林荻港白晝靜
落雁飛鷗盡日閒
平遠起君千里恨

清詩可要助江山

屈原

楚國茫茫盡醉人
獨醒惟有一靈均
餽糟更遣從流俗
漁父由來亦不仁

觀音靈

巖松偃蓋不知年
寂寂秋燈寶供前
清徹一源傳萬古
空山長伴白衣仙

宿慈氏院

樓上鳴鐘報五更
朦朧深殿佛燈明
更無幽夢隨寒枕
聽徹風松到曉聲

巫臣二首

萬古風情不易禁
多言未似不言深
楚王只聽巫臣諫
不道逃吳已有心
咫尺山河不易知
無言莫謂卽無思
人間只見枝頭繭
不悟春蠶暗理絲

北風

北風卷地寒侵骨
凍雪連山鳥不飛
試問朱門餘酒肉
幾人迴首念無衣

洛岸春行二首

溪上映人楊柳黃
滿溪流水碧泱泱
憑君莫向溪南望
春草春風能斷腸

南山晴翠入波光
一派溪聲繞郭長
最愛早春沙岸裏
暖風輕浪拍鴛鴦

漫成七首

應敵詩才慙古人
牽情春色空閒身
鋪排物色雖甘拙

消散閒愁亦有神

脩竹娟娟一萬竿清渠引水正潺潺知時燕子來相語

任意鳧雛去不還

高槐無花亦有陰參天老枝逾十尋流鶯不使人窺見

故隔深條送好音

風吹桃花西復東雨打海棠零亂紅可是春光卽消歇

牡丹音信未全通

江南梅花凌雪霜桃李開盡春無光誰知洛陽三月暮

千金一朶賣姚黃

溪水春來清蕩沙溪南溪北是人家依依陌上多情柳
簇簇原頭自在花
庭陰當午起猶慵斷送殘春醉夢中桑柘成陰桃李盡
一川零亂柳花風

和應之出城

路穿槐柳遶山斜長夏村墟對物華青玉一尋披籜竹
絳繒千片剪榴花

承寧赴晁應之見招賞花途中遇雨

行雲濃淡日無輝輕雨飄飄點客衣馬上漫郎醒復醉

一盃容易送春歸

依韻和晁十七落花二首

投老殷勤向物華
風前猶欲拾餘花
更將夢逐殘紅去
遍入長安百萬家
飛隨風雨落隨流
更有餘紅亦已休
杳杳天涯春物盡
可憐鶯蝶不知愁

和端午

競渡深悲千載冤
忠魂一去詎能還
國亡身殞今何有
只有離騷在世間

偶成

須知庖手有真如
合遣輸人笑讀書
擁褐蒲團深閉目
老人于此有工夫

雙廟

成敗功名付偶然
男兒要是死生間
故應城破知肝膽
飛矢何勞記賀蘭

株林

九寡奔亡一老姬
白頭蠻叟嬖西施
二公費盡平生事
深屋嬋娟世得知

淮上阻風步入寶積山訪軫長老

少年飄泊歸淮東道人住庵何處峯知有招提烟水外
雪雲山路倒杉松

淮上觀冰下

寒淮千里羣冰下古岸枯槎黃葦枝憶得天津橋下見
五門春動雪消時

臣秦恩復恭校

柯山集卷二十四

宋

張

耒

撰

七言絕句

春陰

驚鴻瞥過不容攀病眼淮邊楚望寒獨臥孤舟對楊柳
春風終日在檣竿

宮人斜

青蛾皓齒作埃塵玉匣珠衾地下身一曲壞牆門不鎖
林花開落墓前春

奉先寺

定知生不出長門
禾黍蕭蕭寺後村
松柏城南萬邱冢
傷心最說內人園

至後早赴館二首

紅蠟糝梅冷未黏
柳條偷暖作纖纖
高樓殘白誰家雪
盡日天寒不捲簾

城圍殘雪寒
曉宮近晴雲
暖欲春誰覺
風光添一線
玉壺漏水報雞人

晁二家有海棠
去歲花開晁二呼
杜卿家小娃歌

舞花下痛飲
今春花開復欲
招客而杜已出
守戲以詩調之

頗疑蜂蝶過鄰家
知是東牆去歲花
駿馬無因迎小妾
鴟夷何用強隨車

復答迎郭侯犢車之句

玉壺春酒射朝霞
只看纖腰不看花
但遣舟迎桃葉女
仍須恩賜短轅車

清明日舟中書事二首

清明不到旅人家
乞火鄰船自試茶
弄柳好風低作舞

夾船春浪細浮花

巢鳥噪處綠楊村寒人食家晝掩門
麥隴曉風收宿潤
烟林午日漲春昏

題海州懷仁令藏春亭

聞道山中賢長官種花不肯放春還
故知車馬紅塵地
催促東風不得閒

題綠野亭

渺渺孤亭滄海東天連平野四無窮
可須戶牖毫端上
自攬山河眼界中

漫成三首

驅除牢愁須酒聖狼藉春色要花紅
定知春來無一事
苦教有情愁得儂

容易得愁卽不去苦教春物喚愁生
遣愁飲酒大拙計
遣誰蹙眉爲慢聲

閉門春風作往還誰家有花堪醉眠
柳腰榆莢爭入眼
江梅一枝遠如天

題榮子邕陋居二首

草舍隆中一幅巾閉門三致漢將軍
紛紛自獻知何有

終遣斯人了鼎分

一室荒蕪孺子貧知君四海入經綸殺身虎口終何補
洒掃庭除自可人

秋日有作寓直散騎舍

黃省文書分道山靜傳鐘鼓建章閒天邊玉樹西風起
知有清秋到世間

曉雨

綠滿園林紅已稀濕煙和柳共霏微誰家油壁春寒裏
獨輶天街曉雨歸

送周六赴濠州戶曹二首

老顛有婦何妨道一室蕭然尚愧君但恐小喬來丈室
却須射虎作將軍

從來悟道不出書覲面相呈已有餘麈尾花飛終不近
濠梁古鬼解揶揄

趙弟

男兒何用立奇勳趙弟從軍初不聞但斬郁城侯萬戶
不須猿臂老將軍

贊皇公

才高一世有奇功掩卷令人獨想風莫笑狄祠遷武相
致人從古是英雄

夜來

夜來風雨掠餘春晏起蕭條一病身三月長安泥浩浩
懶隨車馬作游人

桓溫

北征談笑縛姚公靜掃諸陵見洛嵩不用登高笑夷甫
正緣此輩使君雄

和天啓惠橘詩

十年不摘洞庭霜喜見新苞照眼黃但對典刑休嗜味

原注天啓
辭以橘酸

虎賁猶得作中郎

題畫二首

敗蘆浸水凍灘沙朔雪隨風亂綴花濕翅老鴻鳴未起
暮雲山色暗天涯

蒼蒼老石守寒叢雪洒林鳩美睡中鶉傍陳根饑更啄
雀栖高枿暝慈風

題庭木

枯條怪石坐寒禽玉軸高懸畫萬金歲晚荒哇真在眼

寂寥方見此時心

有所歎

駢脅當車鬪戟先相君冠蓋照秦川六雄未滅君無苦
當念杜門公子虔

五更

歲事先教蟋蟀催暮雲樓闕殷輕雷五更庭葉驚殘夢
知有清秋犯雨來

下面

留住長安鬢已絲宮廊還見落槐飛暮雲疎雨蒼龍闕

不惜障泥策馬歸

題史院直舍魚鷺屏

鐘鼓聲稀下直遲秋暉初轉萬年枝寒廳盡日誰相對
慙愧屏風畫鷺鷺

梅花二首

便使柳肥終解舞莫驚梅瘦爲含酸因風自裊還成態
與雪爭妍却要寒

天質自清非爲瘦仙姿正白不施紅未開如怨開如笑
枉乞幽香與北風

採春

啾啾凍草羣飛雀裊裊高林獨嘯猿忽憶淮南春意動
早梅池館斷鴻天

雙槐

老去相看終慘澹秋來無賴對婆娑任從葉逐西風去
要聽庭寬夜雨多

晏起

晚起翻書日欲西偶然乘興忘遨嬉好書自癖非求利
掘冢才須數句詩

和人二首

臘殘春近獨消魂殘雪長安千萬門青鳥何曾寄音信
碧雲剛解報黃昏
曠隴曉日漏春光欄下萱叢尚卧霜認得君家門上雪
易知何事却難忘

天窻

鑿屋分將一尺明坐令隔幌見簾屏任從世界傾盆雨
只要蕭蕭數點聲

失性

尖性摧顏君子鶴忘羞跳擲沐猴冠須知六合梟鸞雜
供與閒人靜處看

夢至一園池藕花盛開水鳥飛鳴爲作二小詩記
之

偶來乘興不須疑一頃秋香欲發時老子婆婆真爲爾
百回相見愧鷓鴣

平池秋水雨來深無數紅妝出岸陰翠幕深藏知有意
白鷗相見本無心

讀王荆公詩

名實由來不可逃悠悠毀譽亦徒勞臧公已死言終立
不是軒裳世祿高

雨霽

豐隆故犯青冥上列缺應逢返照迴樓外細蟾呈窈窕
枝間少女故徘徊

蹇驢

驥伏鹽車饑不行疲牛與爾飽平生子荆自是佳公子
亦向人前作汝聲

局中晚坐

高林晚葉漸疎明雨過長安萬屋青爲問西風來幾日
夕陽宮殿亦秋聲

無題二首

風槐已疎遽如許夜蛩雖怨可若何出門屐齒苔痕滿
隱几書塵鼠跡多

晚起清秋一枕涼四簷鳴雨下淋浪竹籠燒藥時添火
書榻焚香却閉房

鴨鵝

整刷衣裾紫翠新曉天風露壓雞晨應知不置蓮花漏

長喚林中宴坐人

久雨

欹簷積雨苔生瓦陋巷人稀泥及門坡下牛羊來遠墅
舍旁麻糝接荒村

吳江道中懷陸魯望

我亦扁舟一散人江湖爲洗十年塵筆牀茶竈經過地
風月相望亦有神

雪溪道至四安鎮

茗雪清秋水底天夜帆燈火客高眠江東可但鱸魚羨

一看溪山直萬錢

喜雪走筆呈李宣城三首

殷勤寄語宣城宰公事何時是了時
病守欣然有嘉思亦須對雪把空卮

眊眊庭中爭曲直紛紛筆下判鞭笞
坐曹決事輸歸飲須信薛宣稱吏師

萬夫餓腹待倉儲三戶窮民守破圩
疲瘵不禁鞭撻甚長官對酒且歡娛

遊園

病來久不上層臺窻有蛛絲逕有苔
爲報園花莫惆悵故教太守及春來

聞蜚二首

晚風庭竹已秋聲初聽空階蜚
夜鳴流落天涯聊自得今宵爲爾感平生

二年江海轉萍踪白髮蒼顏換舊容
新月窺簷風動竹宣城今夜又聞蜚

雨中題壁

去年此日泊瓜洲衰柳蕭蕭繫客舟
白髮天涯歎流落

今年對雨古宣州

鷓鴣

敗荷枯葦一方池溪上鷓鴣坐得知何事月寒風露下
攣拳孤影在風枝

秋蚊

江城落木已窮秋病客初寒欲襲裘暗宰飛蚊猶撲面
不知天上火西流

冬日

忽忽新冬無一句自憐憔悴楚江濱滿前魑魅何曾禦

尚愧無功作逐臣

預作冬至

紫壇曾從奠琳琅親被天人玉冕光今日黃州山下寺

五更聞鴈滿林霜

原注某元祐七年南都曾與捧皇帝
禮帛席左見上冕玉簪白如雪為燭

所照出光
數尺云

九日登高

黃梨丹柿已催寒一月西風積雨乾紺澗秋天稱行草
卻憑秋鴈作揮翰

試墨

金案冰窻淨絕塵
硯寒龍尾殼生紋
澄江清淺汀洲靜
忽有蒼螭下吐雲

綵花

清寒帶雪未成春
可得芳菲早向人
須遣豔陽歸掌握
故教桃李及芳辰

送窮

年年瀝酒拜清晨
風俗新正競逐貧
不用爲文送窮鬼
直須圖事祝錢神

寄陳州朱教授三首

殷勤寄語朱夫子
僧舍花前亦舉觴
學舍蕭條官職冷
不知誰與戴姚黃
欲曉山禽百種鳴
最憐啞咤是雛鶯
遙想西湖烟柳色
深春風露水邊聲
春雨江干不肯晴
大江櫟岸轉雷霆
山頭方丈渾無事
掃地焚香看佛經

送春

二年江上見春歸
原注子年春在金陵江上
預想重來我未迴
淹速世間誰料得
祇應相遇且銜杯

寓寺八首

門外清泉浸稻畦西南脩竹作城埤川平林斷空明處
卻有遙山作翠眉

道人鐘梵久寂寞倦客弭車聊靜便我亦雲山閒衲子
平生香火舊因緣

病臥淮陽太昊城牡丹叢畔過清明那知春暮長江上
竹裏招提聽曉鶯

江城梅子青時節嫩紫天紅掃地無脩竹滿山連草色
卻煩林鳥勸提壺

翠眉長好何曾損寄語啼禽漫不聞應爲殘春足愁恨

長疑燧破鏡中山

原注有鳥聲如呼翠眉員

平曉春雲失半山濛濛小雨暗江干寺樓倚徧消殘醉
只有春愁伴薄寒

錯落星河沒半空江城悲角五更風幽人夢斷西窗雨
背壁籠燈到曉紅

籠燈到曉只微明獨擁單衾聽雨聲葛幌竹牀清過暑
蕭然未覺負平生

黃葵

黃葵貴麗不妖嬈一朶新晴檻外高
還似邇英臨便坐
曠曠朝日照天袍

聽鳴禽

流滯江邊鬢已霜又聞春鳥啁朝陽
他時北去懷陳迹
寒竹疎梅黃土崗

曉雨

輕陰江上千峯秀
小雨牆邊百草生
惟有春禽慰孤客
曉啼渾似故園聲

黃州酒務稅宿房北窻新種竹戲題于壁

異時小杜高眠地幾向秋風聽楚江
身世浮雲那可計
試留雙竹守寒窻

梅花

我愛梅花不忍摘清香卻解逐人來
風露肌膚隨處好
不知人世有塵埃

分冬

莫驚人事浮雲變且作吾儕飽飯行
白首分冬聊自勸
江城今夜一陽生

食薺糝

論斤上國何曾飽

原注高力士至黔中見齊云
兩京論斤買五溪無人採

旅食江

城日至前常慕藜羹最清好故應不糝媿吾原

原注原
憲藜羹

不糝

戊寅正月八日早寒

濃淡春雲夜雨乾寂寥庭院袂衣寒無人為發樽前笑
但把梅花似舊看

正月七日雪晴

西窓泚雪飄如雨故與新春作薄寒昨夜鴈聲渾向北
夢魂隨去過關山

原注光蔡之
開路名關山

春蔬

新春書劍滯江城又見南蔬入旅羹關心太昊祠前路

小甲連畦帶雪青

原注予有蔬圃在
陳州太昊祠南

讀秦紀二首

烹滅羣雄力未疲赭山射海奮餘威誰知傳與癡兒子
祇得阿房似舊時

汲汲威刑繼祖龍收功終在望夷宮未應家國歸車府
卻有山東老沛公

偶成

許君踏月夜相過此語當時恨已多但願相逢休怨老
不妨白髮聽新歌

春日懷淮陽六首

西城門外古濠清太昊祠前春草生早晚粗酬身計了
長爲閑客此閒行

靈通禪刹古叢林永日惟聞鐘梵音閱世興亡千室佛

百年風雨古牆金

原泮靈通院石晉末所
創有千佛殿壁繪用金

最愛南城汲井園春來蔬甲不勝繁人家斷處無雞犬
遲日東風似古原

黃巢寨南琵琶溝古原芳草靜春流大艣舸舸何處客

牆竿西北是神州

莽莽郊原帶古邱漸漸隴麥散羊牛杏花楊柳春濃處

一片青帘慰客愁

城中萬枝木芍藥姚黃一萼得春多日日踏春渾坐此
人間無醉奈渠何

臣劉鳳誥恭校

柯山集卷二十五

宋

張

耒

撰

七言絕句

上元三絕

清晨謁帝大明宮拜賜歸來夜過中

原註予在秘書近十年每歲上元晨

趨大慶迎駕近午駕回駐輦大慶門上賜茶酒拜謝一退率一二同舍擇勝縱觀至夜分必醉歸歲率為常一

夢十年身老矣山城風月作過從

沽酒壚邊人若市算商亭下浪連天張君官況今如此

豈有工夫作醉眠

江邊燈火似秋螢
哀怨山歌不可聽
自怪今春牢落甚
禪房止酒讀黃庭

二絕句

衙齋無事雨初晴
山澤有容春向深
何物東風吹不散
祇應多病滴官心

茅簷斜日曉雞號
水滿陂塘薺麥高
回首故園空悵望
東門歸路綠迢迢

正月二十五日以小疾在告作三絕是日苦寒

黃土岡頭薺麥長
春陰蔽午日風狂
山前梅落無人見

只有幽禽啼暗香

春色三分有尚多
且饒芳草占高坡
門前柳色如彭澤

爭奈陶君止酒何

原註予方以病止酒

見說櫻桃已爛開
坐愁風雨苦相催
自憐華髮傷春客
兩見飛花未放回

所居有梅一株在堂東荒穢中正月二十六日已

謝矣二首

平生常恨逢梅少
及對江梅無好詩
寂寞荒山少風味
直須雲鬢插斜枝

冷落疎枝寒草岡欲攀先怕踏榛荒異時折處何堪說
臨水高城倚女牆

堂前種二桃詩示秬

平昔殷勤向物華誰知憔悴客天涯雙桃栽罷還惆悵
憶得淮陽舊種花

春日書事

蟲飛絲墮雨悠颺人意遲遲日共長春草滿庭門寂寂
數櫺窻日掛空堂

十月十日夕同文安君對月

林外霜風作夜聲入簷寒月似多情燈前爐畔深杯暖
更聽昭君出塞行

蘄水道中二首

蠶老麥枯田舍忙誰令四月雨浪浪未容烏鳥私遺粒
鳴蚓跳蛙欲滿場

綠野新晴風日涼肩輿細路轉重岡橋邊野水侵官道
旋喚漁舟渡夕陽

感庭沙

桃蹊李徑有塵埃初放青莎秀滿階想見芊緜古城角

有人嗟我未歸來

宿潘君草堂聞蛙聲二首

跳踉鼓怒任爭雄
何事嗚呼聒睡翁
不用洒灰煩魯老
正須兩股付吳儂
孤村足雨菰蒲合
只有羣蛙噪滿陂
我亦閒來無鼓吹
不煩通夕短長吹

齊安春謠五絕

江上魚肥春水生
江頭花落草青青
萋萋芽長蘆筍大
問君底事愛南烹

莫笑江城大如斗
桃花如燒酒如油
人生無病卽爲樂
莫誦離騷澤畔愁

楊柳弄春藏不得
雪絮點點吹人來
輕清潔白非塵物
寄語桃杏莫相猜

赤壁磯前江急流
周郎功業莽悠悠
惆悵沙邊雨中樹
無言俱作古今愁

江頭春泥妨踏春
閉門守春春著人
問春著人作何味
半酣美酒聽韶鈞

衡門

衡門日晏晚雞鳴
下舍人歸半掩局
邑犬無聲山郭靜
暮天寒月撥雲生

橘

靄靄高林綠實圓
清霜一洗若金懸
李衡何等相奴隸
自有高人相國賢

梅

覆釜湖邊雪壓塵
數枝林外已先春
盡將七澤清霜氣
洗出姑山綽約身

水仙花葉如金燈
而加柔澤花淺黃
其幹如萱草

秋深開至來春方已
雖霜雪不衰中州未嘗見一
名雅蒜

宮樣鵝黃綠帶垂
中州未省見仙姿
只疑湘水綃機女
來伴清秋宋玉悲

崇寧壬午臨汝四月始聞鶯二首

青杏登盤櫻壓枝
園林初夏轉黃鸝
一聲風露高林曉
却覺年華總未衰

好音終在恥爭先
谷外寒多故後遷
已過花時亦何恨
不妨夏木綠參天

采石阻雨寄宣城故人二首

風雨江頭思故人
東南煙水濕青春
宛溪東岸垂楊樹
想見煙眉亦解顰

閒雲濃淡作朝陰
柳色江頭春已深
誰為宣城故人說
依依祇似去年心

漫呈无咎一絕

題扇燈前亦偶然
那知別後遠如天
去年醉舞看花處
獨聽琵琶却惘然

壬午臘月下旬偶作二首

啄塊饑禽傍短籬
風鳶一笑起高枝
君看草樹冰霜裏
即是東風欲到時

風折蒹葭水結澌
燕鴻相語定歸期
淮南水闊山長處
小待燕山霰雪晞

泊楚州鎖外六首

滿眼荒寒春未知
芳菲欲到野梅枝
東南近臘風煙好
美酒千鍾魚蟹肥

便風吹舫去無情
漫遣槎牙鐵鎖橫
未嘆客行鷗鳥遠
五更吹角是高城

襄王席上舊行雲二十年間生死分可惜風流一抔土
年年春草斷人魂

流落相逢二十年羞將白髮對嬋娟如何見我都依舊
添得尊前一惘然

水榭踈簾秋夜涼清歌一曲醕瑤觴明朝回首高城處
只有西風卻斷腸

莫愁家住大堤邊朱閣青樓映暮川斜映清淮一梳月
晚妝相對鬪嬋娟

東齋雜詠七首

竹

裊裊牆陰竹數竿秋風盡日舞青鸞平生愛爾緣瀟洒
莫作封君渭上看

菊

野人齋爨屏羶腥自向堦前擷紫莖老去愛花心轉薄
一盃蔬飯足浮生

盆池

點點青萍秋後衰溶溶晴日見魚兒水邊窺影何方客
自照行吟憔悴姿

老槐

雪霜未死閱年華
危葉蕭蕭戰古槎
裊裊秋風官舍冷
半枝斜日帶啼鴉

皂莢

畿縣塵埃不可論
故山喬木尚能存
不緣去垢須青莢
自愛蒼鱗百歲根

南窗

門前塵土慵驅馬
堂上文書厭坐曹
只有南窗慰人意
寒燈清夜讀離騷

道榻

紙閣蘆簾小榻安
一裘容易却輕寒
誰驚午枕江湖夢
風落晴窗柏子乾

牆東二首

牆東椿老葉已盡
堂下菊叢無復香
長安風埃歲已晚
閉門不出馬毛長

歲晚長安足風土
天寒官舍少文書
下馬閉門復無事
壁間佛像對銅爐

凝祥三首

齋祠太一館清真望秩名山固有神斜日苑門人不到
靈風自掃石牀塵

已隨芳草藉盃盤更任垂楊拂馬鞍斜日兩竿眠犢晚
春波一眼去鳧寒

奉靈桃李已堪攀只有春風作往還園吏不須防客到
長安從古少人間

謝人惠金沙醪醖二首

金沙倩麗閨中秀醪醖輕盈飛燕身久無丹白應知我
兩株常守淨名翁

金沙豐腴台德艷醪醖輕盈飛燕身久無丹白應知我
齊散天香供道人

奉安神考御容入景靈宮小臣獲覩有感二首

靈風依傘繡輿深仗外猶疑警蹕音不似尋常遊幸日
樓前鼓吹却沾襟

渭上衣冠故老哀西陵石逕已莓苔從今仗下新歌舞
長及年年獻耐來

次韻子由舍人先生追讀邇英絕句四首

天寒書殿曉班清氣爽仙盤瑞露零講罷羣公佩聲散

一竿宮日轉槐庭

聯翩右史直西垣舊墨螭頭點未乾自是退之平昔事
可須慙著進賢冠

冠佩煌煌拱北辰道人風骨自軒軒茯苓松下龜龜老
須乞靈丹一粒吞

恭默誰聆金玉音陶甄萬物付無心君王好意真天意
憂國論思不厭深

荒園

日暖風簷翻乳燕曉寒露柳轉流鶯荒園日日東風裏

吹盡閒花香草生

東海旅夜二首

無酒消憂寒未減隔帷相對一燈愁蟲聲喚覺五更夢
風雨滿庭桐葉秋

蘭缸背壁影微微千里天涯客夢歸一夜海風聲不斷
曉來寒葉滿庭飛

寄李不危

憶昨東風吹馬蹄瓦關分袂涕交揮淮陽風物應如舊
獨在柯山送雁歸

曉發途中

坐無燈火夜蕭然馬上匆匆未曉天
值驛老兵應笑我肯將斗粟換高眠

病起登疊嶂樓

病來久不上層臺窻有蜘蛛逕有苔
多少山茶梅子樹未開齊待主人來

觀蘇仲南詩卷

蘇子詩如刃發硎十章入耳韻泠泠
文章三昧無多子祇守君家舊典刑

讀仲南和詩

異時文席許論詩三載江湖讀楚詞
自笑酸寒無好語少年倉氏獨相知

謝仲南和詩

曾約西湖薄主人只今湖色已知春
會須多載連車酒絕勝寒倉滿目塵

渡沙河

溶漾澄明徹底清鷓鴣慣客不相驚
却疑洛水新霜後八節灘津石柱聲

題五柳亭

大夫風韻如彭澤五柳蕭森手自栽我亦扁舟倦游者
登臨聊復賦歸來

項城道中

塵壁蒼茫有舊題十年重見一傷悲野僧欲與論前事
自說年多不復知

離京後作七首

蘋芷江邊已五年厭聞風浪打船舷南風蕭艾荒涼野
時望高邱一慨然

水諳送客渾無浪風解留人却有情今夜榆林繫帆宿
却從北斗望天星

灌畦沽酒兩三家春去芳叢有晚花莫道長安在天上
女牛猶有客乘槎

一水夷猶達汝陰年華客意兩相侵河邊無限青青草
攬轡何人繫此心

過雨陂塘處處深南風蕭艾欲成林道邊拾穗行歌者
亦有豐年一飽心

高槐老柳舞南風晴日家家蠶麥中芟盡黃雲見原隰

却教風雨洗長空

燕雀翩翩夏屋深成谿桃李已成陰黃鸝深處無人見
時有清風遞好音

對菊花二首

官閒身世兩悠悠種竹栽花一散愁黃菊叢邊對疎雨
一年懷抱此時秋

躬耕遇歲真吾事牛下齊兒婦妾歌招飲風烟過閒日
遶籬栽菊可如何

臣周兆基恭校

柯山集卷二十六

宋

張

耒

撰

七言絕句

初夏謁告家居值風雨偶作二絕

春愁已逐鶯花盡野果垂簷綠葉稠天上幾回飛破鏡
端居未折大刀頭

高堂終日雨潺潺卻著重裘尚薄寒風雨似秋君莫怪
客愁天色兩相關

西窗雜詠三首

翠蔓垂簷筍過籬幽禽終日傍窻啼山林勝處平生事
他日何妨動我思

穿籬兩竹是龍孫風葉蕭蕭便有聞卻到葛陂心未已
更將甘雨灑川原

稻畦新插綠雲齊雨過溝塍水接溪到舍妻兒勞勤苦
白醪缸畔醉如泥

別齊安稅務窻竹二絕

何獨王郎與爾歡一年慙媿碧琅玕葛陂一別知何處
見盡人間行路難

隨流泛梗雖無定別渚棲鴻亦有情爲問竹窻清夜月
從今誰解聽秋聲

四月二十三日晝睡起

幽人睡足芭蕉雨獨岸綸巾几案涼誰和薰風來殿閣
不知陋巷有羲皇

渡江

白髮人驚老阿童橫江聊借半帆風卻嗟縛得窮孫皓
未似高歌醉閉篷

吳王郊臺

異時隨舉孝廉郎
旗蓋相承據一方
腸繞閭門祥已定
將君畢竟是吳王

題寒溪長老方丈
滿坐繩牀百事貧
荒溪古屋四無鄰
爲生易足君無笑
渠是人間得計人

西人早起二首

滄江初夜雨翻盆
將曉風聲戰亂雲
籬下寒雞鳴曉苦
老人先起自開門

風鳴槁葉未辭枝
雨濕疎梅欲弄姿
地下一陽應蹀躞

世間渾未有人知

冬至贈潘郎二首

荻籬茅屋柯山下
賣餅歸來也作冬
不見長安競時節
車如流水馬如龍

五更人語起江城
歌笑喧喧天欲明
酌酒壽君但一醉
百年珍重是人情

發孝感

裊裊檣烏轉晚空
娟娟霜月入窻櫳
岸頭楊柳如憐客
猶舞蕭蕭五兩風

柯山雜詩四首

幽人睡足戴綸巾策杖開門卯酒醺黃葉滿山烏鵲噪
江城秋日少行人

蕭蕭茅屋土山前翁媪闔門去穫田朝日滿簷雞犬靜
荻籬深處有炊烟

斷澗橫橋卧古槎晚雞鳴處有人家山頭月出疎鐘斷
江上風高落鴈斜

九月江城霜氣清旅人寒事略經營隔窻便是山前樹
永夜葉聲如雨聲

絕句九首

天高列岫出林外霜落大江流地中晚日橋邊數歸牧
牛羊部分聽兒童

樹頭三唱雞賓日門外斜行鴈寄書十月江城霜霰薄
滿山林葉亂藍朱

曉起山鴉噪作團西園霜木倚空寒風高斷鴈呼前伴
雨止歸雲赴舊山

千林黃葉總飛霜寂歷疎梅未肯粧誰信輪囷卧山木
心知九地有微陽

空山風雨冷蓬茅晨起幽人理緼袍深閉衡門且無出
濕雲如墨怒江號

老去不禁茶力悍兩甌破盡五更眠月團三百真魔物
欲乞當壚當酒錢

讀書老眼苦眵昏茗飲無端遣夢魂到處相逢真可喜
祇應酒是好知聞

黃葉桑林赤土岡蓬茅小逕度牛羊似聞流乞之唐汝
歎息何人為發倉原注黃累年旱饑流民就食唐汝

歲弊寒驕風落山卧聽園木怒濤翻去年慈德門東雪

永夜宮廊喝探喧

原注去年春大雪中予以禮官奉欽聖喪事入宿內東門凡數十鋪有廬宮吏達旦不能寐

讀周本紀

周公七百年禮樂箕服屨弧紛破除空使遺臣經故國
徘徊禾黍歎邱墟

齋中列酒數壺皆齊安村醪也今日亦強飲數杯
戲成呈邠老昆仲二首

曾嘗玉皇碧琳腴不醉長安市上酤原注作史官時歲六節賜御醪飲

濕先生今已矣啜醪留得與門徒原注東坡云三年黃州城飲酒但飲濕

放逐江邊長苦飲壺漿尙敢較醇醪中都光祿多新釀
不解隨人得一卮

臥聞風聲

臥聞風聲吹屋角應掃積雨陰漫漫千山月黑烏飛絕
一江星斗魚龍寒

臘月下旬偶作

歲暮烟霜澤國寒曉鴉鳴處是柯山地爐有火樽餘酒
自起焚香深掩關

春日懷臨汝園

西江逆上通清汝憑仗雙魚致我詞若向池邊見鴻鴈
爲言春至苦相思

柯山春望

先教一雨淨江山便放千林春意還何事東風吹客鴈
便教無意戀汀灣

正月十八日四首

幽人睡足聞春鳥共喜暉暉日滿籬里巷收燈人寂寞
鄰家夫婦賃春歸

收燈城市接荒村翁媪耽眠日已暝何事牧童能早起

緩驅白牯出柴門

道旁蘭若冷於秋迎客開門一比邱夜久無人風露冷

空廊飢鼠竊膏油

山下書生業讀書荻籬葛蔓避人居最憐無奈窮耽酒

時遣羸僮致一壺

二十八日

憶昨秋風吹馬啼瓦關分袂涕交揮淮陽春物應如錦

猶在柯山送鴈歸

二月二日挑菜節大雨不能出

久將菘芥芼南羹佳節泥深人未行想見故園蔬甲好

一畦春水輓轡聲

原注北方治菜畦如基坪七極細勻汲井灌之次第相及殊可觀也

二月五日折梅時經雨梅謝矣

江雲灑霽未全開東嶺微茫日色來獨犯輕寒踏春曉

殷勤更折雨中梅

十八日

寒食清明人意閒春城士女出班班柳黃花白樓臺外

紫翠江南數疊山

僧允懷惠紫竹杖

輕堅滑澤節仍勻上下柯山助老身他日天恩許歸去
提攜同踏故園春

寒食日作二首

荒山野水非吾土寒食清明似去年楊柳插門人競笑

荆蠻不信子推賢

原注黃岡有官人效北方以麩作子推貫柳插門上者邦人怪之

朝寒卻覺春衣薄禪誦還將酒盞疎落盡江城千樹雪

門前楊柳已藏烏

牡丹

天女竒姿雲錦囊故應聽法傍禪牀靜中獨有維摩覺

觸鼻惟聞淨戒香

雨霽望樊山

金碧江南數疊山雨餘秀色直堪餐仙娥倭墮青雲髻
照我哀遲澤畔顏

三月二十五日聞鴉鳩

雲夢澤南春欲還柯山鴉鳩曉關關幽人夢覺殷勤聽
落月江風尚薄寒

絕句二首

翠潤園林草木長春歸積雨滿芳塘更無一點殷紅色

葉底青梅已可嘗

晴江水滿長菰蒲野鴨鷓鴣欲哺雛誰爲寄聲沙塞鴈
春來湖野定何如

新堂望樊山

幽人井臼兩山間隣里樵漁盡往還興發登臨窮眼界
江南秀色碧雲鬟

東堂四首

主人憐客置東堂爲致炎天十步涼勝事自來非力致
江南山色巧相望

老翁還作小兒情手種芭蕉爲雨聲便有微泉出堂下

一泓清徹照軒楹

原注堂下種芭蕉數本遂得一泉泓然盈尺殊清徹

居止年來如傳舍構堂珍重主人情浮生行止誰能計
苟合真須學子荆

烏衣更士能呼旦金縷嬌娘解唱歌天與旅人供一笑
不然奈此寂寥何

未伏日五更小涼

幽人短夢不終宵起步星河望沈寥缺月低簷雞一唱
露華秋色滿芭蕉

秋日二首

一庭秋色清如水
籬落蕭條日脚殘
忽憶淮陽舊庭院
出鄰高葉翠梧寒

黃簾朱戶狹洞房
何事易知獨難忘
相思故人雲間月
涼夜皎皎出東廂

樊山

黃葉疎林江上洲
西風角怨夕陽樓
晚天紫翠凌空闊
只有樊山取意秋

月季

月季祇應天上物
四時榮謝色常同
可憐搖落西風裏
又放寒枝數點紅

臥病晝眠秋風作惡

東堂岑寂似僧居
年老身閒不讀書
病卧空牀雞唱曉
窻前飢雀啄寒蔬

東堂初寒創意作竹屏障
門屏脚偶得朽梅枝截
用之完固質野可喜二首

丈室新屏用此君
原注如用鄮子之用碧琅玕插古槎根
白雲一片當空下
護此寒堂宴坐人

簡冊林中老蠹魚年來窮謫尚耽書竹屏風下憑烏几
畫作柯山居士圖

二絕句

幽窻老客寒無睡長聽城樓曉角悲萬里滄溟初浴日
暗雞先向草間知

歲陰慘澹不可出竹榻地爐聊自安黃葉滿山籬落晚
北風吹雨濕荒寒

朝寒

朝寒卯飲已戰勝煮餅一甌充午飢便是衰翁一日了

夜爐茗果亦隨宜

臘初小雪後圃梅開二首

風格孤高又國香故教小雪發新粧修行嗟我無功力
卻使天魔入道場

晨起千林臘雪新數枝雲夢澤南春一塵不染香到骨
姑射仙人風露身

蒼浪

蒼浪鬢髮一衰翁何事年來到骨窮魑魅何嘗居四裔
自憐放逐尚無功

西江

拂瓦輕霜鉛粉輕
東南日出竹窗明
小縷下見西江水
日日風光無限情

二月二十一日東園桃李未開有感二首

日慘東風正怒號
小園寂寂閉蓬蒿
可能春色如人事
獨發元都觀裏桃

寄語元都觀裏花
饒君繁麗奪朝霞
劉郎想到長安日
葵麥風前一歎嗟

自二月末苦雨寒食前一日始晴視園中花乃殊

不敗

春雲灑霽弄朝暉
清峭餘寒透袂衣
最喜園花渾似舊
十分春色一分歸

微雲

微雲灑霽弄餘春
清曉微寒尚著人
重理袂衣溫卯酒
綠陰啼鳥閉衡門

絕句二首

風掉浮烟匝地回
雨將濃翠撲山來
晚涼樓角三吹罷
夕照江天萬里開

荒山岑寂晚雞號獨閉衡門守一瓢風雨似秋君莫怪
客愁逢處易蕭條

雨歇二首

雨歇山園竹引芽老禪睡起日初斜今日卻憶香巖老
解點瀉山一碗茶

家僮取酒衝泥至酒滿山瓶重莫攜老子欣然一笑起
開嘗洗盞對山妻

平生

平生壯節終難變投老浮名信所遭要路爭先寧遽福

從來率野屈吾曹

題南頓光武祠

他日曾休羽葆車可憐官寺已邱墟雲臺諸將鏘冠劍
卻遣巖光配坐隅

發金陵折柳亭

津亭折得綠楊枝更看春風向手吹建業城邊春已老
連天荒草燕雙飛

呈宜君

江城風雨作朝昏愁殺墟邊賣酒人祇有醉時差可喜

不應醒坐過新春

生日贈潘郎

春雨蕭蕭江上城
論花與子酒同傾
恨君未到淮陽市
一見姚黃慰此生

謁蔣帝祠過鍾山下二首

野塘春水綠迢迢
上有東風弄柳條
曉日已穿東嶺出
輕寒猶欲戰駝毛
溶溶野水戲鳧鷖
壠麥初長午景遲
盡日綠楊閒照水
臨風自愛好腰支

和李二秀才

羨君年少盛遊春
顧我無聊似厄陳
東市車牛泥到領
不勞舉袂障京塵

和蘇迺春雪八首

春城北斗轉招搖
寒御初還陣尚囂
一夜雪聲欺布被
定知貧舍故相撩

寒陣須憑酒解圍
閒官幸可典朝衣
一杯冷落憑誰勸
卻有飛花舞入帷

白帝陰兵嚴羽衛
漢皇老傅振鬢眉
撒鹽飛絮渾麤俗

盡撥塵言賦好詩

溪上泛舟成底事
庵前夜立意如何
爭知萬頃青青麥
絕勝黃河一尺波

不死松皇勞借問
未開桃李與催糝
已饒豔女織腰舞
偏犯貧儒百結裳

偏憎遊騎香蹄汗
最稱佳人素手團
方丈老翁容膝外
出門四顧盡漫漫

山中景物最幽奇
祇欠夫君爲賦詩
長憶東風吹女几
瓊瑤交貫碧瑠璃

寒窓凍坐成何事
趣喚紅粧遣暖寒
卻把吟腸盛美酒
更令柔指撥清彈

宿盧村逆旅

夜宿村南貧主人
入門桃李已殘春
無人折贈門前柳
佇立東風獨愴神

紺碧

紺碧遙空秋意生
深簷當午暑風清
老翁睡起支頤坐
初聽新蟬第一聲

真陽縣晝睡縣舍素絲堂

見君堂下小荷葉驚我客中春已空一覺西堂亭午睡
悠悠春夢逐春風

贈圓明老

一粥一齋年已老千經萬論不留心菩提本自非言說
默默知師得更深

方丈小山

窗外幽軒數步寬小山幽石對巔岼說知老子婆娑意
且作僧房一衲看

秋末圭竇齋前菊盛開賦得絕句時和出未歸

幽齋誰與破窮愁蜀錦當軒爛不收白帝屬車千萬乘
玉輪金轂照清秋

秬移宛邱牡丹植圭竇齋前作二絕示秬結和

共我辭家似旅人栽培莫怪倍殷勤明年太昊城中色
來作齊安江上春

千里相逢如故人故栽庭下要相親明年一笑東風裏
山杏江桃不當春

夢靈壽寺

客居有似鴻遵渚鴻渚相看豈有情何事春來頻見夢

老僧談笑起相迎

聞鴉鳴

紙窗未白燭微明
鴉鳴枝頭一兩聲
卻憶去年桃李後
淮陽旅舍聽殘更

甯子

甯子陽愚飽諳事
賈生慟哭漫多愁
無言天道何須問
畢竟人間春復秋

摘芙蓉

今年古寺摘芙蓉
憔悴真成澤畔翁
聊把一枝閒照酒

明年何處對霜紅

悼亡九首

菊花還似去年黃
一寸愁心萬事傷
獨立高樓對殘日
秋風吹得淚千行

遙夜新霜凋碧槐
三更寒月滿堂階
美人化作秋風去
只有秋魂夢裏來

千行垂淚對風烟
萬事傷心兒女前
曉鏡不須催白髮
潘郎秋鬢久蕭然

曉梳零亂髮星星
病眼昏昏怯夜燈
烏几素屏雙草屨

百年從此學山僧

新霜已重菊初殘
半死梧桐泣井闌
可是神傷卽無淚
哭多清血也應乾

亦知存沒等浮雲
鮮笑多悲失道真
卻恐荒唐齊物叟
鼓盆真是已傷神

山僧老去久忘情
笑我多悲白髮生
爲道人間具煩惱
早來林下共修行

嵩陽道出建春門
同入西都四見春
誰謂回頭隔存沒
斷腸今作獨歸人

欲治煩惱更無方
只有頭陀理最長
不待存亡始知夢
故應交臂已淒涼

吳廷選恭校

柯山集卷二十七

同文唱和詩

欲知歸期近呈天啓

未

欲知歸期近屈指不滿手豈無兒女心惜此良邂逅蔡
 郎吾未見心已想雄秀那知風雨夜聽此龍劍吼八荒
 一驥了萬馬空在廐鍾山淨名老爲子不惜口頗聞國
 士薦固自君所有惟應功名地他日容老醜

蔡肇

欲知歸期近朱墨復在手出門豈無時官事少邂逅張
公晚定交千仞仰森秀華堂耿青燈夜半獅子吼真龍
服內閑爽氣凜羣廢新詩陳五鼎斟酌皆可口光華委
行色于我亦何有緘藏不知報刻畫無鹽醜

鄧忠臣

欲知歸期近行行重攜手掖垣隔華省明日難邂逅作
者六七八人崢嶸竦神秀藏蟄龍虎姿風雲卽騰吼嗟予
自遲暮老驥伏閑廐奪珠不量力攬臂犯牙口平生辛

苦行何足為已有正似逢毛嬙歸憎羞光醜

晁補之

眉山見張侯心許出一手臨川得蔡子千載慰邂逅鄧
君起南國磊磊看三秀譬如黃鍾陳我尚瓦釜吼欲知
歸期近喚馬牽出廐官醪持餉婦傾瀉僅漬口千章輸
明堂勿問草澤有羣公自凜凜冰鏡照妍醜

初伏大雨戲呈无咎

未

初伏炎炎坐湯釜長安行人汗沾土誰傾江海作清涼

玄雲駕風橫白雨普陀真人甘露手能使渴乏厭膏乳
且欲當風展簟眠敢辭避漏移牀苦清貧學士臥陶齋
壁上墨君淡無語翰林但解嘲苜蓿彭宣不得窺歌舞
聯詩得句笑出看策馬涉泥歸閉戶牀頭餘儘定何嫌
窗外石榴堪薦俎

補之

蓬山西鄰九軌路三月街晴葉吹土直廬鑿牖面宮垣
青壁嶄嶄看垂雨殿角風斜碧瓦寒翅濕蒼鳶不能乳
卻思窮巷亦可憐一掃蚊虻通夕苦鬱蒸書課未須忙

午漏客休聽天語平生豪氣對樽酒山雞見鏡猶能舞
城南寺近曉堪行笙歌涼月聞千戶但憂伏日紉君須
割肉無緣俟歸俎

曹輔

火焚真金融作暑南風無聲蒸厚土省門下馬不讀書
急掃藤牀卧聽雨朝涼已覺飯有味紫盃新茶如潑乳
天工未費一杯水已變炎涼異甘苦晁侯笑顧北窻竹
知君吟詩得佳語忽驚秋近梧桐落未厭野潤商羊舞
快洗晚空作晴碧三更月華清萬戶不怕泥深滑馬蹄

更自無金謀燕俎

忠臣

大明放朝官避暑長廊翛翛絕塵土漢家宮殿敞千門
紫閣拖雲灑甘雨雷欣電笑洗蒸鬱蕩蕩青天滑流乳
憶昨三年田舍中六月正服農家苦豈望生還直舊廬
得見張晁說新語初聽鈞天驟竊怵正似聲聞躩起舞
喜乘初涼與晤歌不憂庭潦墊垣戶徑攜斗酒相就醉
更置雙鯉充君俎

汗流龜趺如炊釜蜉蝣飛空蟻運土眼看織雲上太清
曾不崇朝八荒雨金柔火老旱太甚阻嚼冰雪如飴乳
豐隆列缺及時來蒼生解除焦焚苦張侯不辭茅屋漏
倚柱長吟可人語愛君豪猛爲君和初撫劔歌終起舞
城南酒壚醅新撥不獨黃公當門戶滿沽鴟夷極歡酌
抽摘園蔬供鼎俎

突冷塵魚生甑釜十年都城困風土不辭揮汗過三伏
敗屋怯聽滂沱雨張侯作詩召清風渴讀如飲雪山乳
笑我形容太瘦生我亦悔前用心苦晁子迭唱亦起予
兩人終日同堂語奈何拘學技藝窮跛鼈欲趁驪驕舞

魁然圍腹貯文史朝來氣爽寬酒戶爲君急置槎頭鱖
縷翠霏紅落雕俎

神龜不識烹魚釜生潛深淵長黃土誰令誤落魚網中
白晝冥冥作雷雨嗟予幡然別舊隱空巖無人滴鍾乳
松菊滿山胡不歸顧同妻子忍攻苦長歌漫漫何時旦
起坐中夜私自語茅茨十九漏如澗誰知華堂醉歌舞
山中吾廬歸去來峯插翠玉朝高戶注目操刀必割時
尸祝何煩越樽俎

肇

城中鼎食排翠釜羊胛駝峯賤如土青衫學士家故貧
斗米束薪炊濕雨縱橫圖史照屋壁帖躡詩騷從稚乳
省中無事騎馬歸雨聲一洗茅簷苦急呼南巷同舍郎
聽我臨風有清語且貪青簡事文章未有黃金買歌舞
往來詩卷牛腰許太羹元酒竝在戶吾詩老澀邀使前
正坐可口收艱俎

贈文潛

肇

張侯胷中包覆釜百里奔流無寸土元蛟白鼉有時作

一洗乾坤三日雨詩雄變怪有如此震動猶能止啼乳
已傾太白酒船空更壓少陵飯山苦昨朝東門同拜救
玉齒猶殘道中語閉門十日無一事坐對空庭秋葉舞
何時御史出霜臺便假前騶辭棘戶城南邀我倒餘樽
紫栗黃橙已登俎

答天啓

未

黃鍾無聲登瓦釜蔡子青衫在塵土逼人爽氣百步寒
知子胷中有風雨三年河東走鐵馬絕口魚蝦便酪乳

歸來萬卷付一讀不覺兒曹用心苦周瑜陸遜久寂寞
千年北客嘲吳語莫徒彩筆雲錦張要是寶劍蛟龍舞
天兵百萬老西北快馬如飛不出戶看公大纛出麒麟
走取單于置刀俎

和天啓贈文潛

補之

蔡侯飽學困千釜濯足清江起南土放談頗似燕客雄
快奪范睢如墜雨東城擒羽未足論柏直何爲口方乳
蔣侯山中伴香火三年不厭長齋苦平生豪偉有誰同

要得張侯三曰語晝閒那自運斃忙時清不用聞雞舞
桓榮歡喜見車馬書冊勤辛立門戶要當食肉似班超
猛虎何嘗窺案俎

再答

肇

羌兵昔出臯蘭路欲鏟新城無聚土烟烽照夜氣如霞
鐵馬連羣歎成雨東西兩關同日破股掌嬰兒絕哺乳
鼓聲十日拔帳歸至今猶說防城苦當時諸將無奇功
不敢彎弓向敵語橐駝西來金帛去孽狐小鼠猶跳舞

王師八月盡防秋惴惴軍興恐編戶腐儒不用輒憂邊
廟堂有人制樽俎

呈鄧張晁蔡

輔

都城薄祿纔三釜白髮朱衫汗黃土九人同日鎖重關
一夜濤聲卷秋雨投身雖喜豪俊窟刺手如逢虎方乳
鄧侯相逢十載後清骨巉巖詩思苦張晁自是天下才
黃卷聊同取賢語蔡子彎弓欲射虎拔劍酒酣時起舞
何當連袂上霄垠速致時康門外戶病夫行矣老江湖

尸祝安能越庖俎

余幹

可畏日輪如赤釜賴有羣仙司下土稍從寥廓躡濃雲
旋向塵埃灑甘雨松蘿旣女更施澤山木欲童俄得乳
馬牛暫息要途勞魚鼈頓舒炎海苦野鶴那虛屋上鳴
穴狸不繆山中語清風豈假白羽搖輕汗寧沾翠綃舞
已憐爽氣滿襟袖更喜餘霞照庭戶後朝便是閩英才
爲指嶢嶺設干俎

次韻辛文潛學士同年

柳子文

才堪斗量君獨釜年少登瀛脫塵土重闢幾日鎖清秋
酬唱新篇亂如雨讀書相逢十載前君家酥酪和腐乳
案此下原闕晚將衰颯奉英遊漫記雪窗邀夜語平生
苦字韻二句意氣杯酒閒我醉狂歌君起舞卽今頭白老青衫但期
教子應門戶燕領從來骨相殊看君鼎食羅五俎

用俎字韻呈樗年

肇

墮竈一言能破釜魔界掃空成佛土鍾山道場天所開

萬壑千巖散華雨白衣居士演真諦江海滔滔流法乳
自從玉髻飛上天妙緣誰救諸有苦我昔南行入定林
水鳥松風能妙語六時天樂彩雲飛百丈寒江翠綃舞
此地知君曾著力雷作彈指開蟄戶空山蕙帳盍思歸
秋末晚菘行可俎

次韻天啓戲爲禪句之作

幹

一片木柴投向釜不是知音色如土道途漫用運三車
根性終然資一雨相逢儻獲箇中人涓滴何辭比驢乳

善才童子天質奇拋官遠遁修行苦果向北山曾遇人
便解捐書尋一語而今脫卻七斤衫相見山山惟作舞
秋闈何幸相握手未厭夜深來叩戶莫愁客至將何待
臥有眠牀飢有俎

上呈子方鄉丈

肇

西方殘寇魚游釜往歲天兵收境土軍行旱海口生烟
沙井無泉天不雨將軍意氣吞八荒欲入涼州傾馬乳
堅城不下河未冰幕中稍覺從軍苦曹侯獻計取東關

帳下選鋒同此語歸來塞色侵鬢毛聯翩始閱交衢舞
不學行間妄校尉盡斬孫歆封萬戶人生富貴有危機
凝眉不願加雕俎

次韻答天啓

輔

天兵連營十萬釜烈烈威聲震西土崑崙月窟掃欲空
豈止斯民被時雨賀蘭狡兔遁三穴黃口嬌雛未離乳
臨機一失挫鈇鋒誰願忠言如藥苦吾鄉蔡子喜談兵
早歲曾過阿戎語逸才自擅鸚鵡賦高韻仍為鸚鵡舞

方略應須敵萬夫徒擊韓嫣笑當戶正宜弱冠請長纓
繫取單于置高俎

曹子方用釜俎字韻賦詩見遺予洎張文潛晁无
咎蔡天啓因以奉酬并示四友

忠臣

長愛陳思詠其釜幾年不見徂南土竭來相逢翰墨場
夜窻共聽空階雨躍馬蔡卿能齧肥好書張侯期飲乳
晁令知從博士遷智囊不厭傳經苦于茲邂逅如夙契
瞻我劬勞勤晤語詩成乍變龍虎文筆落更驚鸞鳳舞

我將隱遁山林姿公等整頓乾坤戶分同尺鷁搶榆枋
難使犧牛登鼎俎

臣周兆基恭校

